



Ilulissat, 14. juuli 2016.

UKA 2016/71

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara.

Kingusinnerpaamik 1. januar 2017 aallarnerfigalugu ukiuni tallimani misiligummik teriannissat, tulukkat naajallu eqqissisimatinneqarunnaarallarnissat pillugu Naalakkersuisut peqquneqarnissaannik Inatsisartut aaliangiiffigisassaattut siunnersuut. Misileraanerup naareersimalernerani misileraanerup kingunerisaasa sunniutai pillugit nalilersuiffiginerat saqqummiunneqassalluni, ilaatigut eqqissisimatitsinerup atorunnaavissinnaanera pillugu nalilersuisoqassalluni.

(Inatsisartunut ilaasortaq, Anthon Frederiksen, Partii Naleraq)

Tungavilersuut:

Tamanit ilisimaneqarpoq, teriannissat, tulukkat naajallu qangaanerusumut naleqqiullugu piniagaasarnerat annikillerujussuarnikuusoq.

Taamaammallu uumasut timmissallu pineqartut inoqarfinni ilaatigut annertuumik akornutaalersimasut nalunngilarput. Ilami allaat peqqissutsimut akornusiisinnaallutillu inunnik uumasuutinillu allanik ulorianartorsiortitsisinnaapput, pingaartumik teriannissat perlerortarnerat eqqarsaatigalugu.

Tassami aamma nunatta kujataani savaateqarfinni tusarsaajualerpoq, teriannissat perlerortut uumasuutinut allannut saassussisartut.

Aamma naluneqanngilaq, qeqertat ilaanni, soorlu imeqqutaalaqarfinni teriannissat assorujussuaq akornutaalersimasut. Tassani immikkut eqqaasariaqarpoq “Kitsissunnguit” eqqissisimatitaanissaat pillugu Namminersornerullutik Oqartussat nalunaarutaat nr. 11, 17. april 2008-meersoq tungavigalugu qeqertat inatsisitigoortumik eqqissisimatinneqalersimasut ilaat.

Taamaammat teriannissat akornutaalersimanagerat akiorneqassappat, taakku ukiuni tallimani eqqissisimatitaasarunnaarallarnissaat avaqqukkuminaatsoq takuneqarsinnaavoq.

Naajat tulukkallu inoqarfinnut qanilligaluttuinnarput, ilami allaat kalaaliminernik piliniarnermi qangatut aalisakkanik neqinik assigisaannillu silami ikaanut nivinngaannissat mianernarsisimapput.

Tassami sunngiffimmi pinialuttartartugaanni inuutissartiutigalugulu aalisartugaanni piniartugaannilu ikaanut panertuliassanik nivinngaassagaanni, kisianni-una nivinngakkat ulissorlugit allatulluunniit tulukkanik naajanillu pineqarnaveerlugit aaqqissuussivigeqqaarlugit.

Pingaartumillu naajat eqqarsaatigalugit timmissat allat manniliortarfiini, manninnik timmissallu allat piaraannik ilanngarterilluartartut ilisimaneqarpoq.

Aamma ilisimaneqarpoq, pingaartumik naajat tulukkallu eqqaaveqarfinni illullu naligninnaasumik eqqaaviini serlersaarisartut.

Taamaammat naajat tulukkallu inoqarfinni, timmissallu manniliorfiini akornutaalersimanagerat akiorneqassappat, taakku ukiuni tallimani eqqissisimatinneqartarnerat atorunnaarsinneqarallartariaqarnera avaqqukkuminaappoq.

Allaffissornikkut aningaasatigullu pisortanut kingunerisinnaasai:

Aningaasartuutissat AC-p ukiup sisamararterutaanut sulineranit nalitunerussanngitsoq naatsorsuutigaarput imalu naleqartussaasoq naatsersorpat 125.000 kr.

Allaffissornikkut aningaasatigullu inuiaqatigiinnut kingunerisinnaasai:

Isumaqarpugut siunnersuut inuiaqatigiinnut pitsaasumik toqqissinartumillu kinguneqarsinnaasoq.

Allaffissornikkut aningaasatigullu namminersortunut kingunerisinnaasai:

Soqanngilaq.

Avatangiisinut kingunerisinnaasai:

Naajat tulukkat teriannissallu ikilinerat, timmissanut allanut, pingaartumik timmissat eqqissisimatinneqartut eqqarsaatigalugit pitsaasumik kinguneqarsinnaasoq qularinngilarput.